

Debi na hopi peticion di publico 'Abo So' lo pasa e fin di siman aki



ORANJESTAD -- Fin di siman cu a pasa 'Abo So' tabata 'sold out' y hopi ta es nan cu a keda sin wak e pelicula. Pa cumpli cu e demanda The Cinemas Paseo Herencia ta pone dos ultimo presentacion durante e fin di siman aki, riba diasabra 5 di april pa 2'or y 4'or di atardi y riba dia-domingo 6 di april tambe pa 2'or y 4'or di atardi. E pelicula ta aplicabel pa e prijs di matinee. Cu e compra di un ticket

despues di desconta tur gasto, e resto lo wordo inverti den mas produccionnan local. Door di asisti na e pelicula comunidad ta contribuyendo na engrandece nos cine local.

Fundacion AVI ta gradici comunidad pa e apoyo ricibi, 'Abo So' sigur no lo tabata un éxito sin e acogida di nos hendenan cu a describi e pelicula como un pelicula di nos cu ta laga bo sinti orguyoso di ta

Arubiano.

Tabata aña pasa rond di e mes un dianan aki na april cu e team di 'Abo So' tabata trahando duro incansabel for di 6'or di mainta te cu 11'or di anochi, filmando diferente escenan na diferente localidadnan rond di Aruba. Durante dies dia 'Abo So' a wordo filma, debi na un presupuesto hopi chikito cu no a duna pa tin hopi dianan di filmacion. "E prome escenan cu nos a graba tabata e escenan final, e actornan mester a proyecta sentimentonan di e personahenan na un momento culminante di e storia sin cu nan a actua e principio di e storia" Pardo e director a describi. E actornan tabata

prepara for di antemano y nan a practica e escritura di e pelicula hunto cu e director. Tur e cancionnan a wordo graba den menos cu dos siman prome cu e filmacion di e pelicula a cuminsa. Ful e pelicula no a wordo graba na un manera cronologico esaki tabata importante pa haci e proceso di filmacion mas lihe. Traha un pelicula no ta facil y e ta un proceso complica cu ta rekeri un trabou den conhuntio. E team di 'Abo



So' tabata determina pa haci e film posibel cu e recursonan disponibel na Aruba. 'Abo So' ta un produccion local traha specialmente pa nos hendenan cu hopi pasion, amor y dedicacion.

Fundacion AVI ta sigui traha proyectonan cultural cu mensahenan positivo pa Aruba. AVI dentro di poco lo start cu un otro proyecto cultural titula Biba Cultura unda cu cada participante por traha un video mensahe. Tambe participantenan por siña traha un poster mescos cu esun di 'Abo So' uzando potret y ilustracion. Na e tayer di Biba Cultura lo enfoca riba mensahenan cu tema di Papiamento, Dera Gay y Dande. Tur persona interesa por bishita www.bibacultura.com pa mas informacion. □

